

I N M E M O R I A M

Prof. HUSEIN MUFTIĆ



Trećeg februara 1985. godine u Sarajevu je preminuo prof. Husein Muftić. Sahranjen je petog februara na Gradskom groblju u Sarajevu, u prisustvu velikog broja prijatelja, kolega i poštovalaca. Vijest o njegovoj smrti primljena je sa velikim bolom među svim geodetskim stručnjacima, njegovim bivšim studentima i mnogobrojnim saradnicima.

Svoj životni put profesor Husein Muftić započeo je 6. februara 1908. godine u Mostaru. Školovao se u Mostaru, Sarajevu i Zagrebu, gdje je 1936. godine završio Geodetsko-kulturnotehnički odsjek Tehničkog fakulteta i stekao naziv diplomiranog inženjera geodezije i kulturtehnike.

Rad u struci započeo je 1937. godine kada je kao službenik Ministarstva saobraćaja radio u Tuzli i Doboju na trasiranju željezničke pruge Tuzla-Zvornik-Banja Kobiljača. Od 1939. do 1941. godine radio je kao geodetski inženjer na osnovnim geodetskim radovima u Vojno-geografskom institutu u Beogradu. U ratnom periodu od 1941. do 1945. godine izvodio je komasacione i melioracione radove u Hrvatskom Zagorju i Slavoniji.

Po oslobodjenju zemlje radi u Ministarstvu gradjevina Bosne i Hercegovine u Sarajevu na problematici vodnih zajednica i obnovi porušenih mostova, škola i drugih važnih objekata. Koncem 1946. godine prelazi na rad u Republičku geodetsku upravu u Sarajevu, gdje se bavi premjerom rudnika Banovići i grada Mostara.

Početak školske 1947/48 godine počinje njegov dugogodišnji put prosvjetnog i naučnoistraživačkog radnika, kojem ostaje vjerran praktično sve do smrti. Radi najprije kao profesor na Geodetskoj tehničkoj školi u Sarajevu, a potom je 1949. godine izabran za predavača na predmetu Geodezija na Poljoprivredno-šumarskom fakultetu u Sarajevu. Na Šumarskom fakultetu u Sarajevu izabran je 1953. godine za docenta, a 1963. godine za vanrednog profesora za isti predmet. Umirovljen je 30. septembra 1977. godine.

Tri decenije predavao je profesor Muftić predmete Geodezija, Trasiranje cesta i željeznica, Hidrotehničke melioracije i Agrarne operacije djacima Geodetske tehničke škole, te studentima Šumarskog, Poljoprivrednog, Gradjevinskog fakulteta i Više geodetske škole u Sarajevu.

Objavio je više udžbenika i skripata: Trasiranje željeznica i cesta za učenike Geodetske tehničke škole, Geodezija za studente šumarstva, Hidrotehničke melioracije sa uredjenjem zemljišta za stude-

nte Više geodetske škole, Osnovni elementi geodezije za studente Poljoprivrednog fakulteta. Takodje je objavio više stručnih i naučnih radova od kojih su najvažniji: Tehničko uređenje zemljišta NR BiH - osnova za socijalistički preobražaj sela i Plastika područja BiH kao faktor traktorizacije poljoprivrede.

Profesor Muftić se stalno borio za usavršavanje nastavnog procesa. Bio je nastavnik široke tehničke kulture, koji je uz to imao i urodjene pedagoške kvalitete.

Bio je aktivan društveno-politički radnik. Kao član SKJ doprinio je oblikovanju stavova i zaključaka u organizaciji Saveza komunista u kojoj je djelovao. Bio je aktivni član samoupravnih organa na Šumarskom fakultetu, pokazavši puno inicijative pri rješavanju pitanja koja su bila predmetom rasprave. Nadalje, djelovao je u Savezu geodetskih inženjera i geometara, čiji je dugogodišnji član Uprave, a dvije godine je bio predsjednik Saveza. Aktivno je sudjelovao i u radu Udruženja univerzitetskih nastavnika sarajevskog Univerziteta.

Za svoj plodan rad dobio je društvena priznanja, od koji su najznačajnija Orden rada sa zlatnim vijencem i Plaketa Univerziteta u Sarajevu na 25. godina uspješnog rada.

U trajnom i neizbrisivom sjećanju ostaće nam profesor Muftić, kao otvoren, originalan i dobronamjerman čovjek, uvijek spreman da pomogne kolegi i drugu, a prije svega studentu u sticanju znanja. Bio je strog, ali do kraja pravedan u odmjeravanju ocjene. Studenti su to cijenili i poštivali, trudeći se da svojim znanjem opravdaju takav stav svoga profesora.

Zahvalni smo mu za sve što je radio i uradio. A dao je od sebe sve što je mogao, bez velikih riječi, nenametljivo i tiho. Životni put profesora Muftića predstavlja uzor i ponos za našu sredinu, njegovu obitelj i sve prijatelje.

Takav je bio naš Huso i takvog ćemo ga zadržati u našim sjećanjima.

Neka mu je vječna slava i hvala!

Nihad Kapetanović